

CRESURAS

Pastoriu e massaria in limba sarda

Custa rubrica naschit cun s'idea de faeddare de sa massaria e de su pastoriu, ma finas de ecolozia, de ambiente, de territòriu e de totu cussas chistiones chi pertocant sos pastores e sos massajos in antis de totu de sa provintzia de Aristanis e de Sardinna ma non solu.

Cherimus punnare, mese pro mese, a afinicare su tema chi in cussu tempus est prus atuale o est de prus interessu pro chie leghet. Si cheret, duncas, arregonare in manera crara de sos problemas, de sas novidades de saS oportunitades chi b'at a aere pro sas impresas agrìculas e zootènicas sardas. At a èssere finas s'occasione pro connòschere menzus sas aziendas: comente traballant, ite produint, cales sun sos mercados inue benden.

Cun s'isperu de resessire a una banda a offèrere a chie leghet argumentos de interessu e a s'àtera a rispondere a sas dimandas, a crarire sas dudas e duncas a dare una manu de azudu a su massaju e a su pastore.

L'amus a fàghere in limba sarda ca una limba bia comente su sardu tenet sa capatzidade de contare e de bìdere unu territòriu in manera diferente, e ca semus cumbintos chi su sardu galu oje est sa limba prus addata a comunicare *cun* massajos e pastores e *de* massajos e de pastores e finas cun chie cheret lèghere de pastoriu e de massaria.

Confagricoltura Sardinna zai dae paritzos annos faghet una parte de sa comunicatzione istituzionale, sindacale e organizzativa in limba sarda finas cun s'idea de proare a recuperare cun sa limba iscrita paraulas chi oe che semus ismentighende ca non semus prus avesos a las pònnera a fitianu in unu setore in su cale imbetzes sa limba at sinnadu in manera funguda su traballu, sas fainas, sos trastis de impreu, in fines su modu de fàghere, de traballare, de produire e duncas de bìvere de sas fèminas e de sos òmines de campu.

Sa rubrica at a èssere cuidada dae mie, Banne Sio. So orgolesu ma dae belle bint'annos traballo in Casteddu in sa sede rezionale de Confagricoltura. So amantiosu de sa limba e de sa cultura sarda e dae annos iscrio in sardu pro ziornales e revistas. Apo iscritu in sardu sa tesi de laurea subra sos cuntratos de pastoriu e de terachiu in Sardinna e in Orgosolo in particolare e apo iscritu e bortadu in sardu finas ateros liberos. Torrende gràtzias a su direttore de su giornale pro s'oportunidade de iscriere in sardu de temas chi zugo a coro ispero de resessire a comunicare cun bois cun sa limba nostra.